



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՎԻՎ/141/2024

Ո Ր Ո Շ ՈՒ Մ

ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

ք. Երևան

31 մայիսի 2024թ.

Կոռուպցիայի կանխարգելման հանձնաժողովը, մասնակցությամբ Հանձնաժողովի անդամներ Մարիամ Գալստյանի (նիստը նախագահող), Արամայիս Փաշինյանի և Լիլիթ Ալեքսանյանի (այսուհետ՝ Հանձնաժողով), 2024 թվականի մայիսի 31-ին քննելով Երևանի քաղաքապետարանի աշխատակազմի քարտուղար Դավիթ Համբարյանի ընտանիքի անդամ Էմմա Աշոտի Խաչատրյանի նկատմամբ Վարչական իրավախախտումների վերաբերյալ օրենսգրքի (այսուհետ՝ Օրենսգիրք) 169.28-րդ հոդվածի 5-րդ մասով նախատեսված զանցանքի հատկանիշներով առերևույթ խախտման կապակցությամբ հարուցված վարչական իրավախախտման վերաբերյալ թիվ ՎԻՎ/141/2024 գործը՝

ՊԱՐԶԵՑ

I. Վարչական իրավախախտման վերաբերյալ գործի վարույթի նախապատմությունը.

1.1 Հանձնաժողովը, ղեկավարվելով «Կոռուպցիայի կանխարգելման հանձնաժողովի մասին» օրենքի 25-րդ հոդվածի 1-ին մասի 5-րդ կետով սահմանված իրավակարգավորումներով, ինչպես նաև հիմք ընդունելով 2024 թվականի հունիսի 24-ի ԶԼՄ-ի կողմից կատարված՝ «Դավիթ Համբարյանը չի հայտարարագրել իր բաժնեմասը»

վերտառությամբ հրապարակումը¹, իրականացրել է Երևանի քաղաքապետարանի աշխատակազմի քարտուղար Դավիթ Համբարյանի ընտանիքի անդամ Էմմա Աշոտի Խաչատրյանի 2021 թվականի գույքի, եկամուտների և ծախսերի հայտարարագրում (այսուհետ՝ Հայտարարագիր)՝ ներկայացված տվյալների ստուգում, որի արդյունքում պարզել է.

1.2 Էմմա Աշոտի Խաչատրյանը Հայտարարագրի «Հայտարարատու պաշտոնատար անձի ընտանիքի անդամի եկամուտներ» Գ.1. բաժնի «Հաշվետու տարվա եկամուտներ» Գ.1.1. ենթաբաժնում չի հայտարարագրել մոտավորապես 1,000,000 ՀՀ դրամի չափով եկամտի վերաբերյալ տվյալ, մինչդեռ Հանձնաժողովի 2024 թվականի հունվարի 31-ի 01/335/2-2024 գրությանն ի պատասխան վերջինիս կողմից 2024 թվականի փետրվարի 16-ի Մ-739-2024 գրությամբ ներկայացված պարզաբանման և կից ներկայացված փաստաթղթերի ուսումնասիրությունից պարզ է դարձել, որ Էմմա Աշոտի Խաչատրյանը 2021 թվականին «Էմմա Խաչատրյան ԱԶ»-ից ստացել է մոտավորապես 1,000,000 ՀՀ դրամի չափով եկամուտ:

1.3 Հանձնաժողովը, 2024 թվականի մայիսի 23-ին Օրենսգրքի 169.28-րդ հոդվածի 5-րդ մասով նախատեսված զանցանքի հատկանիշներով Էմմա Աշոտի Խաչատրյանին հասցեագրել է թիվ 01/1587-2024 ծանուցումը՝ հրավիրելով վարչական իրավախախտման վերաբերյալ արձանագրության կազմման՝ նշված գրությունը ստանալուց հետո 3-րդ օրը, ժամը՝ 11:00-ին, ինչպես նաև նշված գրությունը ստանալու 5-րդ օրը, ժամը՝ 11:00-ին՝ վարչական իրավախախտման վերաբերյալ գործի քննության:

1.4 2024 թվականի մայիսի 29-ին պատշաճ ծանուցված Էմմա Աշոտի Խաչատրյանի ներկայացուցիչ Նաիրի Միրզոյանի ներկայությամբ կազմվել է վարչական իրավախախտման վերաբերյալ թիվ ՎԻՎ/161/24 արձանագրությունը՝ Օրենսգրքի 169.28րդ հոդվածի 5-րդ մասով նախատեսված առերևույթ իրավախախտման հատկանիշով:

1.5 Վարչական իրավախախտման վերաբերյալ գործի քննության տեղի և ժամանակի մասին պատշաճ ծանուցված Էմմա Խաչատրյանի բացակայությամբ 2024 թվականի մայիսի

¹ <https://hetq.am/hy/article/152434>

31-ին՝ ժամը՝ 11:00-ին տեղի է ունեցել վարչական իրավախախտման վերաբերյալ գործի քննություն:

II. Վարույթի մասնակցի ներկայացրած դիրքորոշում ու պարզաբանումներ

Ի պատասխան Հանձնաժողովի 2024 թվականի հունվարի 31-ի 01/335/2-2024 գրության՝ 2024 թվականի փետրվարի 16-ին Հանձնաժողով մուտքագրված թիվ Մ-739-2024 գրությամբ էմմա Աշոտի Խաչատրյանը ներկայացրել է պարզաբանում առ այն, որ ինքը ունեցել է ոչ ռեգուլյար աշխատող միկրո բիզնես՝ էմմա Խաչատրյան ԱԶ, որի մասին թյուրիմացաբար չի նշել, քանի որ 2022 թվականին եկամուտ չի ունեցել: 2021 թվականին եկամուտ եղել է, որի մասին պարզապես մոռացել է նշել՝ ըստ էության 2022 թվականին եկամուտ չլինելու ազդեցության տակ: Ըստ այդմ, 2021 թվականին, տուրքերից և այլ վճարներից հետո, ունեցել է մոտավորապես 1,000,000 ՀՀ դրամի չափով եկամուտ: Պարզաբանմանը կցել է 2021 և 2022 տարեթվերի համար միկրոձեռնարկատիրության շրջանառության վերաբերյալ Պետական եկամուտների կոմիտեի կողմից ընդունված հաշվետվությունները:

Բացի այդ, էմմա Աշոտի Խաչատրյանի ներկայացուցիչ Նաիրի Միրզոյանը վարչական իրավախախտման վերաբերյալ արձանագրության կազմման ժամանակ բացատրությամբ հայտնել է, որ էմմա Խաչատրյանի կողմից Պետական եկամուտների կոմիտե ներկայացվող տարեկան հաշվետվության մեջ խնդրո առարկա հանդիսացող տվյալը ներկայացվել է, ուստի չի եղել որևէ դիտավորություն պետական մարմիններից թաքցնելու որևէ տվյալ:

Չհայտարարագրված 1,000,000 ՀՀ դրամը վրիպակի արդյունք է: Ուստի հաշվի առնելով վերոգրյալը խնդրել է կիրառել նվազ նշանակություն, և էմմա Խաչատրյանի նկատմամբ տույժ չկիրառել:

III. Վարույթի համար էական նշանակություն ունեցող փաստեր

Հանձնաժողովը, ուսումնասիրելով թիվ ՎԻՎ/141/2024 գործում առկա նյութերը, կատարել է հանգամանքների քննություն և հաստատված է համարում, որ՝

3.1 Էմմա Աշոտի Խաչատրյանը Հայտարարագրի «Հայտարարատու պաշտոնատար անձի ընտանիքի անդամի եկամուտներ» Գ.1. բաժնի «Հաշվետու տարվա եկամուտներ» Գ.1.1. ենթաբաժնում չի հայտարարագրել մոտավորապես 1,000,000 ՀՀ դրամի չափով եկամտի վերաբերյալ տվյալ, մինչդեռ Էմմա Աշոտի Խաչատրյանը 2021 թվականին «Էմմա Խաչատրյան ԱԶ»-ից ստացել է մոտավորապես 1,000,000 ՀՀ դրամի չափով եկամուտ:

Հանձնաժողովը հաստատված է համարում, որ Հայտարարագրում առկա է ոչ ամբողջական ներկայացված տվյալ:

IV. Որոշումն ընդունելու իրավական հիմքերը և հիմնավորումները.

4.1 Երևանի քաղաքապետարանի աշխատակազմի քարտուղար Դավիթ Համբարյանի ընտանիքի անդամ Էմմա Աշոտի Խաչատրյանը «Հանրային ծառայության մասին» օրենքի (այսուհետ՝ Օրենք) 34-րդ հոդվածով սահմանված կարգավորումների համաձայն՝ հանդիսանում է գույքի, եկամուտների և ծախսերի հայտարարագրման պարտականություն ունեցող անձ:

4.2 Օրենքի 41-րդ հոդվածի (Եկամուտների հայտարարագրի բովանդակությունը սահմանող) 1-ին մասի համաձայն՝ հայտարարագիրը ներառում է սույն հոդվածով սահմանված եկամուտները և դրանց ստացման աղբյուրները: Նույն հոդվածի 4-րդ մասի 11-րդ կետի համաձայն՝ հայտարարագրման ենթակա են Հայաստանի Հանրապետության դրամով, արտարժույթով կամ բնամթերային (ոչ դրամական) ձևով ստացված **ձեռնարկատիրական գործունեությունից ստացված եկամուտը**: 4.3 Նույն հոդվածի 6-րդ մասի համաձայն՝ Նույն հոդվածի 6-րդ մասի համաձայն՝ Եկամուտը հայտարարագրելիս նշվում են՝

1) եկամտի տեսակը.

2) եկամտի ստացման աղբյուրը՝ եկամուտ վճարողի անվանումը կամ ազգանունը, անունը և հայրանունը, հասցեն, եկամուտ վճարողի և նրանց միջև առկա կապի բնույթի մասին տեղեկատվություն.

3) եկամտի չափը (գումարը).

4) եկամտի արժույթը:

4.4 Օրենքի 34-րդ հոդվածի 6-րդ մասի համաձայն՝ հայտարարատու պաշտոնատար անձի՝ պաշտոնեական պարտականություններն ստանձնելու, դադարեցնելու հայտարարագրերը ներկայացվում են պաշտոնեական պարտականություններն ստանձնելու, դադարեցնելու օրվա դրությամբ: Տարեկան հայտարարագիրը ներկայացվում է յուրաքանչյուր տարվա հունվարի 1-ից՝ տվյալ տարվա դեկտեմբերի 31-ը ներառյալ ընկած ժամանակահատվածի համար:

4.5 «Վարչական իրավախախտումների վերաբերյալ» օրենսգրքի (այսուհետ նաև՝ Օրենսգիրք) 169.28-րդ հոդվածի 5-րդ մասի համաձայն՝ հայտարարատուի կողմից հայտարարագրում **անզգուշությամբ սխալ կամ ոչ ամբողջական տվյալ** ներկայացնելը առաջացնում է տուգանքի նշանակում՝ սահմանված նվազագույն աշխատավարձի երկուհարյուրապատիկից չորսհարյուրապատիկի չափով:

4.6 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 1-ին մասի համաձայն՝ Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի հետ կապված հարաբերությունները կարգավորվում են Վարչական իրավախախտումների վերաբերյալ Հայաստանի Հանրապետության օրենսգրքով, ինչպես նաև «Վարչարարության հիմունքների և վարչական վարույթի մասին» Հայաստանի Հանրապետության օրենքով՝ հաշվի առնելով սույն օրենքով սահմանված առանձնահատկությունները:

4.7 «Վարչարարության հիմունքների և վարչական վարույթի մասին» օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական

հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

4.8 Օրենսգրքի 252-րդ հոդվածի համաձայն՝ մարմինն ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և իրավագիտակցությամբ:

4.9 Օրենսգրքի 244.17-րդ հոդվածի համաձայն՝ Օրենսգրքի 169.28-րդ հոդվածով նախատեսված վարչական իրավախախտումների վերաբերյալ գործերը քննում և վարչական տույժեր է նշանակում Հանձնաժողովը:

4.10 Օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝ 1) վարչական տույժ նշանակելու մասին, 2) գործի վարույթը կարճելու մասին:

4.11 «Կոռուպցիայի կանխարգելման հանձնաժողովի մասին» օրենքի 26-րդ հոդվածի 3-րդ մասի համաձայն՝ Հանձնաժողովը Վարչական իրավախախտումների վերաբերյալ Հայաստանի Հանրապետության օրենսգրքով նախատեսված վարչական իրավախախտումների վերաբերյալ վարույթի արդյունքում ընդունում է որոշումներ, որոնք կարող են բողոքարկվել «Վարչարարության հիմունքների և վարչական վարույթի մասին» Հայաստանի Հանրապետության օրենքին համապատասխան՝ դատական կարգով:

Սույն գործով հաստատված փաստական հանգամանքների նկատմամբ կիրառելի իրավական նորմերի վերլուծության արդյունքում Հանձնաժողովն արձանագրում է.

Օրենքով սահմանված հայտարարագրման ենթակա տվյալներին վերաբերող իրավակարգավորումներով սահմանված պահանջներն ամբողջական կերպով ներկայացված են նաև հայտարարագրերի լրացման էլեկտրոնային համակարգում, որտեղ հայտարարատուի կողմից լրացվում են Օրենքով պահանջվող վերաբերելի տվյալները: Հայտարարատուն հնարավորություն ունի ընտրել կոնկրետ գույքի տեսակը, դրա վերաբերյալ այլ տեղեկություններ, **եկամտի տեսակը, դրա վերաբերյալ այլ տեղեկություններ**, շահերի դեպքում՝ կազմակերպության անվանումը,

կազմակերպությունում ունեցած ուղղակի կամ անուղղակի մասնակցության չափը, հավատարմագրային կառավարման հանձնված լինելը և այլ տեղեկություններ:

Հանձնաժողովի 2020 թվականի նոյեմբերի 12-ի N 04-Ն որոշմամբ սահմանվել են հայտարարագրի ներկայացման և հայտարարագրված տվյալներում փոփոխություն կատարելու կարգը, հայտարարագրի լրացմանը ներկայացվող պահանջները:

Առաջնորդվելով նշված որոշմամբ սահմանված հայտարարագրի լրացմանը ներկայացվող պահանջներով՝ Հանձնաժողովը հայտարարագրերի լրացման կարգի խախտում է որակում այն դեպքերը, երբ հայտարարագրման **ենթակա տվյալը** լրացվել է սխալ ենթաբաժնում: Այն դեպքում, երբ հայտարարատուի ներկայացրած տվյալին վերաբերող որևէ տվյալ չի լրացվում համապատասխան դաշտում և լրացվում է այլ ենթաբաժնում՝ հայտարարատուն թույլ է տալիս հայտարարագրի լրացման կարգի պահանջների խախտման արարք, մինչդեռ, Օրենքով պահանջվող **հայտարարագրման ենթակա առանձին տվյալները չներկայացնելու կամ սխալ ներկայացնելու դեպքում՝ թույլ է տալիս ոչ ամբողջական կամ սխալ տվյալների ներկայացման արարք:**

Սույն գործով Երևանի քաղաքապետարանի աշխատակազմի քարտուղար Դավիթ Համբարյանի ընտանիքի անդամ Էմմա Աշոտի Խաչատրյանը Հայտարարագրում **անզգուշությամբ** ներկայացրել է հետևյալ ոչ ամբողջական տվյալը.

Հայտարարագրի «Հայտարարատու պաշտոնատար անձի ընտանիքի անդամի եկամուտներ» Գ.1. բաժնի «Հաշվետու տարվա եկամուտներ» Գ.1.1. ենթաբաժնում չի հայտարարագրել մոտավորապես 1,000,000 ՀՀ դրամի չափով եկամտի վերաբերյալ տվյալը:

Հաշվի առնելով արձանագրված իրավախախտման նկատմամբ կիրառելի իրավական նորմերի պահանջները՝ սույն գործով առկա փաստերից հետևում է, որ Էմմա Աշոտի Խաչատրյանը Հայտարարագրում անզգուշությամբ ներկայացրել է ոչ ամբողջական տվյալ, որի արդյունքում թույլ է տրվել Օրենսգրքի 169.28-րդ հոդվածի 5-րդ մասով սահմանված արարք:

Խախտման հիմքով պատասխանատվություն սահմանելու հարցը որոշելու համար Հանձնաժողովը գտնում է, որ անհրաժեշտ է յուրաքանչյուր գործով գնահատել, արդյո՞ք տվյալ խախտումը հանգեցրել է նորմով պաշտպանվող իրավահարաբերությունների խաթարմանը: Այս առնչությամբ էական է խախտման (արարքի) որակական կողմը:

Արարքի որակական կողմը գնահատելիս անհրաժեշտ է հաշվի առնել՝ արդյո՞ք արարքը կարող է պարունակել Օրենսգրքով սահմանված արարքի հատկանիշներ և այնպիսի էական վնաս չի պատճառել ֆիզիկական կամ իրավաբանական անձին, հասարակությանը, պետությանը, որի հիմքով սահմանված պատասխանատվությունը կդիտարկվի համաչափ:

Էմմա Խաչատրյանը մոտավորապես 1,000,000 ՀՀ դրամ եկամուտը չհայտարարագրելու փաստի առնչությամբ իր գրավոր դիրքորոշմամբ հայտնել է, որ այդ տվյալը թյուրիմացաբար չի նշել, պարզապես մոռացել է այդ մասին նշել: Իսկ վերջինիս ներկայացուցիչը նշել է, որ Էմմա Խաչատրյանի կողմից Պետական եկամուտների կոմիտե ներկայացվող տարեկան հաշվետվության մեջ խնդրո առարկա հանդիսացող տվյալը ներկայացվել է, ուստի չի եղել որևէ դիտավորություն պետական մարմիններից թաքցնելու որևէ տվյալ:

Հանձնաժողովն անհրաժեշտ է համարում ընդգծել այն, որ իր կողմից նախորդիվ կայացրած որոշումներով (Հանձնաժողովի՝ 2021 թվականի մայիսի 4-ի թիվ ՎԻՎ/08/2021, 2021 թվականի մայիսի 4-ի թիվ ՎԻՎ/11/2021 որոշումներ) ոչ ամբողջական տվյալների հայտարարագրման հետ կապված նվազ նշանակության են որակվել այն դեպքերը, երբ պաշտոնատար անձի չհայտարարագրած եկամուտը չի գերազանցել նրա պաշտոնեական դրույքաչափի համար սահմանված աշխատավարձը: Էական է գնահատվել նաև այն, որ հայտարարատու պաշտոնատար անձի եկամուտը ստացվել է մեկ աղբյուրից:

Հանձնաժողովի կողմից նախորդիվ կայացրած այլ որոշումներով (Հանձնաժողովի՝ 2022 թվականի մայիսի 26-ի թիվ ՎԻՎ/21/2022, ՎԻՎ/22/2022, 2022 թվականի մայիսի 31-ի ՎԻՎ/26/2022 որոշումներ) ոչ ամբողջական տվյալների հայտարարագրման հետ կապված նվազ նշանակության են որակվել այն դեպքերը, երբ պաշտոնատար անձի

չհայտարարագրված եկամտի վերաբերյալ տվյալների վերաբերյալ ամբողջ և անհրաժեշտ ծավալի տեղեկությունն արդեն իսկ տրամադրվել է պաշտոնատար անձի կողմից նույն հայտարարագրի մեկ այլ բաժնում:

Հանձնաժողովը գտնում է, որ սույն գործով խախտումը կատարվել է այնպիսի փաստական հանգամանքների համադրությամբ, որոնք նույնական չեն նախորդող վարչական ակտերում առկա փաստական հանգամանքների հետ: Մասնավորապես, սույն դեպքում առկա չէ հայտարարատու անձի պաշտոնական դրույքաչափի համար սահմանված աշխատավարձի վերաբերյալ տեղեկատվություն, ինչպես նաև չհայտարարագրված եկամտի մասով տվյալների վերաբերյալ ամբողջ և անհրաժեշտ ծավալի տեղեկությունը ներկայացված չէ Էմմա Խաչատրյանի կողմից ներկայացված հայտարարագրի որևէ այլ բաժնում:

Ինչ վերաբերում է Էմմա Խաչատրյանի ներկայացուցչի կողմից ներկայացված այն դիրքորոշմանը, համաձայն որի Էմմա Խաչատրյանի կողմից չհայտարարագրված 1,000,000 ՀՀ դրամը Պետական եկամուտների կոմիտե ներկայացվող տարեկան հաշվետվության մեջ արդեն իսկ ներկայացվել է, ապա Հանձնաժողովը հարկ է համարում նշել, որ «Կոռուպցիայի կանխարգելման հանձնաժողովի մասին» ՀՀ օրենքը Հանձնաժողովին վերապահել է պետական և տեղական ինքնակառավարման մարմիններից, Կենտրոնական դեպոզիտարիայից և արժեթղթերի սեփականատերերի (անվանատերերի) ռեեստրի վարման իրավունք ունեցող այլ անձանցից, վարկային բյուրոներից պահանջել (այդ թվում՝ էլեկտրոնային հարցման եղանակով) հայտարարատու պաշտոնատար անձի և նրա ընտանիքի կազմի մեջ մտնող անձանց առնչվող տեղեկություններ, փաստաթղթեր և ստանալ դրանք, ***մինչդեռ այդ իրավասությունը հայտարարագրման ենթակա տվյալները հայտարարագրում ներկայացնելու պարտավորությունից հայտարարատուին չի ազատում:***

Հանձնաժողովը նույնանման դիրքորոշում է արտահայտել նաև իր 2022 թվականի մայիսի 25-ի ՎԻՎ/12/2021 որոշմամբ:

Հանձնաժողովն արձանագրում է, որ Օրենքի 41-րդ հոդվածի (Եկամուտների հայտարարագրի բովանդակությունը սահմանող) 1-ին մասով սահմանված իրավակարգավորումների համաձայն՝ հայտարարագրում պետք է ներառվեն հաշվետու տարվա ընթացքում **ստացված բոլոր եկամուտները և դրանց ստացման աղբյուրները**: Մինչդեռ, տվյալ պարագայում Հանձնաժողովն արձանագրում է, որ մոտավորապես 1,000,000 ՀՀ դրամի չափով եկամտի վերաբերյալ տվյալները ներկայացված չեն Էմմա Խաչատրյանի Հայտարարագրում, ուստի Հանձնաժողովը հաստատված է համարում, որ Հայտարարագրում առկա է ոչ ամբողջական ներկայացված տվյալ:

Հանձնաժողովն արձանագրում է, որ Օրենսգրքի 169.28-րդ հոդվածը նպատակ է հետապնդում ապահովել պետական պաշտոն զբաղեցնող անձի (ինչպես նաև վերջինիս ընտանիքի անդամի) հանրային հաշվետվողականությունը, վերջինիս հանրային գործունեության նկատմամբ վստահությունը, պետական պաշտոն զբաղեցնող անձի (ինչպես նաև վերջինիս ընտանիքի անդամի) գործունեության թափանցիկությունը և հնարավոր կոռուպցիոն դրսևորումների բացահայտումն ու դրանց նկատմամբ հանրային վերահսկողությունը:

Միաժամանակ, հաշվի առնելով, որ Օրենսգրքի 169.28-րդ հոդվածի 5-րդ մասով սահմանված արարքի համար նախատեսված է վարչական պատասխանատվության ոչ հստակ սահմանաչափ (**տրուգանքի նշանակում՝ սահմանված նվազագույն աշխատավարձի երկուհարյուրապատիկից չորսհարյուրապատիկի չափով**), Հանձնաժողովն արձանագրում է, որ Օրենսգրքի 169.28-րդ հոդվածի 5-րդ մասով վարչական տույժ կիրառելիս պետք է հաշվի առնել ինչպես խախտման բնույթը, այնպես էլ պատասխանատվությունը ծանրացնող կամ մեղմացնող հանգամանքները:

Հանձնաժողովը գտնում է, որ սույն գործով առկա չէ Օրենսգրքի 34-րդ հոդվածով նախատեսված վարչական իրավախախտման համար պատասխանատվությունը ծանրացնող որևէ հանգամանք, ինչպես նաև առկա չէ Օրենսգրքի 33-րդ հոդվածի 1-ին մասով սահմանված վարչական իրավախախտման համար պատասխանատվությունը մեղմացնող հանգամանք:

Ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 6-րդ կետով, 26-րդ հոդվածով, «Վարչական իրավախախտումների վերաբերյալ» օրենսգրքի 169.28-րդ հոդվածի 5-րդ մասով, 244.17-րդ հոդվածի 1-ին մասով՝ Հանձնաժողովը

Ո Ր Ո Շ Ե Ց

1. Երևանի քաղաքապետարանի աշխատակազմի քարտուղար Դավիթ Համբարյանի ընտանիքի անդամ Էմմա Աշոտի Խաչատրյանի նկատմամբ կիրառել վարչական տույժ սահմանված նվազագույն աշխատավարձի երկուհարյուրապատիկի՝ **200 000** (երկու հարյուր հազար) ՀՀ դրամի չափով:

2. Տուգանքը պետք է վճարվի իրավախախտողի կողմից գանձապետական 900005001335 «Իրավախախտումների համար կիրառվող վարչական տուգանքներ և պատժամիջոցներ» հաշվեհամարին՝ վճարման անդորրագրի «**նպատակ» դաշտում պարտադիր նշելով սույն որոշման համարը:**

3. Սույն որոշումն ուժի մեջ է մտնում Էմմա Աշոտի Խաչատրյանին այն սահմանված կարգով հանձնելու (հանձնված համարվելու) հաջորդող օրվանից:

4. Սույն որոշումն ուժի մեջ մտնելուց հետո Էմմա Աշոտի Խաչատրյանին տրամադրել եռօրյա ժամկետ Հայտարարագրի համապատասխան բաժնում ուղղումներ կատարելու համար:

5. Սույն որոշումը կարող է բողոքարկվել ՀՀ օրենսդրությամբ սահմանված կարգով և ժամկետում:

ՀԱՆՁՆԱԺՈՂՈՎԻ ՆԱԽԱԳԱՀԻ

ՊԱՐՏԱԿԱՆՈՒԹՅՈՒՆՆԵՐԸ ԿԱՏԱՐՈՂ՝

ՄԱՐԻԱՄ ԳԱԼՍՏՅԱՆ